



Centro Nacional Chega! I.P

Da Memória À Esperança



Diskursu husi Sr. Diretór Ezekutivu Centro Nacional Chega! I.P, Hugo Maria Fernandes Iha Serimonia Inagurasaun Muzeu Chega!

Inagurasaun Muzeu Chega! - Ai-Funan Mos Bele Moris-Buras iha Prizaun

Antigo Comarca Balide, Dili - 7 Dezembru 2024

Nai no Lou Sira, Exelensia

Ho Laran ksolok tebes, ohin ami simu Exelensia Presidenti, Primeiru-Ministru, Ambassador Sira, Membru Parlamento Nacional, Membru Governu, Xefe Estado Maior Jeneral F-FDTL, Tenentu Jeneral Falur Rate Laek, Komisariu Jeral PNTL, Provedor Direitus Umanus no Justisa, Patriota Sira Libertasaun Nasional Nian, Alin estudante sira no konvidadu de Onra sira hotu iha Antigo Comarca Balide, fatin istoriku ida mak marka trajetoria tomak konaba istoria Timor-Leste nian, liu-liu istoria konfliktu nian husi tinan 1975 to'o 1999, hodi inagura Muzeu Chega!. Naran ne'ebe foti husi Relatoriu Final Komisaun Simu Malu, Lia loos no Rekonsiliaun.

Ohin lora 7 Dezembru mos lora importante ida konaba rezistencia povu Timor-Leste nian hodi defende nia direitu ba auto-determinasaun no soberanu Estado RDTL nian mak Proklama iha 28 Novembru 1975. Nune'e Governu Timor-Leste dekreta Lora 7 Dezembru nudar Lora Nasional Memoria nian.

Na'l Presidenti Republika, Exelensia Dr. Jose Ramos-Horta, halo reflesaun ba ita nia pasadu ne'ebe hakerek ona iha Relatoriu Chega! hodi dehan katak "Relatóriu CAVR nian hanesan ensiklopedia ida kona-ba ita-nia istória riku ho lisaun no sofrimentu. Ita tenke uza ninia lisaun bo'ot atu kompriende ho di'ak - ba krize ne'ebé mosu... no atu tulun ita prevene krize iha futuru."

Muzeu Chega! harii ho objetivu atu selebra memoria povu Timor-Leste nian iha ambitu atu defende direitu fundamental sira ne'ebe konsagra ona iha Deklarasaun Universal Direitus Umanus ONU nian. Iha Muzeu Chega! ita sei haree, rona, aprende no refleta konaba atosidade dezumanu oioin mak ema, grupu politiku no nasaun ida halo hodi atinji nia objetivu politiku sira. Muzeu Chega! mos hatudu rezistencia, persistensia, prezerveransia no solidariedade ema nian hodi defende sira nia direitu fundamental sira.

Nai no Lou Sira,

Centro Chega! harii ho misaun ida atu prezerva memoria pasadu no halo memoria ne'e asesivil liu husi maneira oi-oioin, hodi valoriza no dignifika ema sira mak partisipa iha defende direitus



Centro Nacional Chega!.P

Da Memoria A Esperanca



umanus no mos introdus memoria ne'e ba publiku liu husi edukasaun, liu-liu atu aprende hosi memoria pasadu nian hodi garante atu atosidade moruk sira la akontese tan no harii kultura dame ida iha sosiedade Timor-Leste nia laran.

Atu to'o ba misaun ne'e, wainhira Na'l Primeiru-Ministru, Kay Rala Xanana Gusmão vizita Centro Chegalia fulan Maiu, ami apresenta konaba Muzeu Chega!. Primeiru-Ministru apresia ba servisu ne'e no Primeiru-Ministru hato'o orientasaun ba Centro Chega! atu loke mos muzeu sira iha Munisipiu sira, hodi bele rona no dokumenta ema sira nia memoria konaba sira nia partisipasaun iha luta ba ukun rasik a'an. aleinde ohin ita inagura Muzeu Chega!, Centro Chega! servisu hamutuk ho Autoridade Munisipal, Konselu Kombantente Libertasaun Nasional, ASSEPPOL no Asosiasaun Vitima mos harii tiha ona Muzeu Memorial Munisipal sira iha Suai, Vikeke, Aileu, Maliana no iha loron 20 Dezembru ne'e, sei inagura mos Muzeu Memorial Munisipiu Manatuto nian. Karik konvidadu sira vizita munisipiu sira ne'e, halo favor bele ba vizita mos Muzeu sira ne'e. Profunda gratidaun ami hato'o ba Nai Primeiru-Ministru, Nai Ministru Konsellu Ministru no Nai Visi Ministru Asuntu Parlamentar mak kontinua fo orientasaun no apoiu mai Centro Chega! hodi hala'o misaun nobre ne'e.

Nai no Lou sira,

Muzeu Chega! harii laos atu kontinua kuda hela odio no vingansa husi jersaun ba jersaun, maibe Muzeu Chega! harii atu fo sintidu boot ba lia-fuan Chega! rasik, katak iha Timor-Leste ne'ebe mak ukun rasik aan, la bele iha tan violasaun sira ba ema nia direitu fundamental sira. Muzeu Chega! harii atu kontinua mensazen murak no kmook sira husi nai ulun nasaun ida ne'e nian iha audensia publika CAVR nian hanesan hau sita tuir mai:

Na'i Saudoso João Carrascalao hatutan mós katak "Ita nasaun ida, iha ona moris foun ida, ita persiza hetan hahalok foun ida, ita hotu fö ita-nia kontribuisaun hodi buka moris foun ida."

Na'i Saudosu Prezidente Francisco Xavier do Amaral hatete katak "Se ita hakarak halo pás, halo dame ba Timoroan sira, tenke halo ho didi'ak... ita tenta no tenke tenta bebeik, ita la bele haluha atu eduka ita-nia ema sira no ito-nia povu para sira hodi bele perdua malu."

Lia fuan ho makarti (signifikansia) konaba poder aprende nian hato'o husi Saudozu Prezidenti Nicolau Lobato ne'ebe dehan katak iha funu ne'e, ita buka atu "Sabemos, E Podemos e Devemos Vencer - eh Ita hatene, hodi nune'e ita bele no ita sei manan!."

Nai no Lou sira,

Muzeu ne'e mos nudar dedikasaun espesial ida ba Timoroan sira eis prizioneiru politiku sira, feto no labarik sira. Sira hotu-hotu mesak revolusioneriu no Patriota Libertasaun Nasional Timor-Leste nian. Maske iha terus nia laran sira la rende. Hanesan lia fuan barani husi Maria Goretti



Centro Nacional Chega! I.P

Da Memoria A Esperanca



Joaquim, feto foin sae ida mak dadur iha ne'e ho otas seidak 17 no lakon to'o agora. Maria Goretti Joaquim iha nia terus sira, hatete katak" Sira bele kolonializa hau nia isin, maibe sira sei la koloniza hau nia ispiritu no hau nia fuan."

Exelensia sira, kaer metin ba prinsipiu sira mak temi ona iha leten, ami fiar katak Muzeu Chega! tenki sai nudar simbulu id aba Identidade Nasional Timor-Leste nian. Identidade ida ne'ebe mak Conselho Nacional Rezistencia Timorese (CNRT) temi iha Priambulu Magna Carta CNRT nian iha fulan Abril 1998 iha Peniche, Portugal, katak.... "Ilha Timor-Leste ne'ebe mak ukun rasik aan, labarik no joven sira mak reprezenta ita nia futuru. Protesaun no promosaun ba sira nia direitu sira tenki sai ita nia prioridade. Sira nia edukasaun tenki bazeia ba kuda hikas domin no respeito ba moris, dame, justisa no igualdade, nune'e mundu foun ida bele harii husi akudesan funu nian."

Exelensia sira,

Muzeu Chega! ne'ebe mak ohin ita sei inagura no sai duni fatin aprendizazen ne'e harii hikas ho apoiu generozidade husi Governu Republika Federal Alemana, liu husi Ministeriu Negosio Estranzeiru Alemana no Embasada Governu Republika Federal Alemana nian Indonezia no Timor-Leste iha Jakarta, ne'ebe mak reprezenta husi Ambadora Ina Lepel. Apoiu ne'e signifikante tebes iha ambitu atu prezerva memoria murak povu Timor-Leste nian. Centro Chega! hato'o ami nia profunda gratidaun ba generozidade Governu Republika Federal Alemana nian.

Hamutuk ho Ambadora Ina Lepel hahu kedas iha tinan 2022, ami dezenvolve idea no defini objetivu hodi harii Muzeu Chega! hodi alina ho Mandatu Centro Chega! nian katak Antigo Comarca Balide tenki sai nudar Center for Historical Awareness, Human Rights, and Peace in Timor-Leste ka sentru ba konsiensia Istorika, direitus umanus no paz iha Timor-Leste.

Aleinde ne'e, entre Centro Chega! ho Embasada Governu Republika Federal Alemana mos sublina atu Muzeu Chega! sei kontribui ba atinji ODS 16 konaba paz, justiza no instituisaun, ODS 5 konaba igualdade jeneru, jestu ida ba implementasaun Rekomendasaun CAVR iha Timor-Leste no hodi konsolida dame ne'ebe sustentavel liu husi espasu ba kura kanek no aprendezajen; Muzeu nee mos tenki funsiona nudar espasu ba fahe kunesementu no promove lia-loos, direitus umanus, edukasaun dame no konsiensia ba jeneru; no fatin nee mos, tenki sai nudar simbulu ida ba reparasaun, rekunesementu publiku ba vitima konfliktu nian sira.

Nai no Lou Sira,

Apresiasaun rohan laek mos hato'o ba Dr. Andi Achdian, Profesor Istorika husi Universidade Nasional, Jakarta no mos Diretor Sejarah Lintas Batas (SINTAS), Sra. Diana T Yudistira, Sr. Lambok Hutabarat no Kompaneiru Wilson Obrigados no Sr. Agus Nugraha iha mak sai nudar parseiru Centro Chega! nian hodi dezenvolve Muzeu Chega! Apresiasaun no agradesementu mos



Centro Nacional Chega!!P

Da Memoria A Esperanca



ami hato'o ba Diretor Ezekutivu AMRT, Diretor Jeral ANTL, Prezidenti ASSEPPOL, Asosiasaun Vitima, Komite 12 Novembru, Arte Moris no CAMSTL no mos eis prizioneiru no eis prizioneira sira hotu ne'ebe fo apoiu tomak ne'ebe kontribui ona mai Centro Chega! husi entrevista no arkivu dokumental no audio visual sira ne'ebe mak apresenta iha Muzeu Chega!

Iha biban ne'e mos hau hakarak louva no fo apresiasaun as tebes ba servisu diak ne'ebe mak ekipa Projeitu Muzeu Chega! halo ona. Obrigadu uain ba Senor Januario Soares nudar jestor ba projeitu, Sr. Julio Amaral-Muzeulogu, ofisial sira projeitu nian sira Sra. Maria Parlan no Sra. Bertillia Pereira, Peskizador-sira: Dr. Mateus Ivo Goncalves no Dr. Rogerio Savio, nebe'e iha tinan 2 nia laran konsege ultrapasa dezafiu sira ho parseiru ne'ebe mak mais rigorozu iha hau nia esperiensa servisu ho doadores sira. Agradese mos ba apoiu boot husi Konsellu Administrasaun, kargu xefia sira no kolega hotu-hotu Centro Chega! nian ba sira nia kontinuasaun apoiu hodi exerse mandatu sira Centro Chega! nian. Apresiasaun mos hato'o ba kompania Timoroan, OMDAI Engineering ne'ebe mak rehabilita sela sira no produz painel sira exhibisaun nian.

Atu taka hau hakarak sita Lia Kmanek husi Sua Exelensia Prezidenti Republika Kay Rala Xanana Gusmão iha tinan 2003, iha Audensia Publika CAVR nian konaba Konflitu interna, hato'o lia murak ne'e, ne'ebe kontinua relevante to ohin loron, no hau sita: "...Povu sei hakarak, tamba ita-nia futuru kaer hela ba ita-nia promesa boot sira. Futuru ida iha demokrásia, futuru ida respeitu malu, futuru ida iha, hodi hanoin - ho partisipasaun konsiente, responsavel hosi ema hotu-hotu no ema ida - idak nia kapasidade -, ita sei halo Timor ida boot duni."

Obrigadu uain

Hugo Maria Fernandes
Diretór Ezekutivu